

**NATIONAAL ARCHIEF 'S-GRAVENHAGE**

**HANDSCHRIFTEN DERDE AFDELING**

**TOEGANGSNUMMER 3.22.01.01**

**INVENTARISNUMMER 1354**

**AKTEN VAN BELENING MET DE HEERLIJKHEID**

**EN HET HUIS ASPEREN**

**TUSSEN CA. 1313 EN 1464**

**16<sup>e</sup> EEUW**

**AFSCHRIJFTEN**

**1 KATERN**

**BEWERKING DOOR**

**ANTHONIUS VAN DER TUIJN**

**TE RHOON**



## Voor eventuele vragen, opmerkingen en verbeteringen

([anthoniusvandertuijn@gmail.com](mailto:anthoniusvandertuijn@gmail.com)).

Als u gegevens uit deze bewerking gebruikt voor genealogische of historische doeleinden, dient een verwijzing naar deze bewerking vermeld te worden. Bij gebruikmaking van gegevens uit deze bewerking ten behoeve van publicaties, in welke vorm dan ook, moet een adequate bronvermelding naar deze bewerking worden vermeld.

### **Folio 1.**

#### **Roerende Asperen mit dat dair an cleeft.**

Copie.

Ic Otte van Hoclem heer van Asperen knape make cond etc. dat ic mijnen lieven heer heeren Willem grave van Henegouwen, van Hollant etc. op ghedraghen hebbe met vrien wille mine vrie heerscap van Asperen gheleghen tusschen Larosteghe ende den Broecvliete ende die porte Asperen ende hebse ontfangen van hem te houden toot eenen rechten erflene, also dat niet verstorven en mogen die heerscap ende die poerte en sullen comen op mijnen naesten erfnamen. Ist mans oft ist wijfhoeft ende dat ic ende mijne nacomelinge dair rechten sal an halze ende an hoefde ende an laighe gelijcke dat ic te voren plach eer icse hem op gaff. ende des gerechts en zal hij hem niet onderwinden ende hier bij zal hasperen die poirte zinen openen poirte wesen wanneer dat hijs te doene hevet. Ende is love voir mij ende mine nacomelinge mitte heer den grave voirn. te dienen alst een trouwe man sinen heer sculdich es te dienen. Ende omme dat ic wille dat dit vaste ende stade blijve zo hebbe ic gebeden minen lieven heer heeren Ghijen bisscop totten Utrecht dat hij in orkonde der sticken die voirsz. sien dese letteren ghemeene mitt min bezegelen wille. Ende wi Gheije bijden genaden gods bisscop toet Utrecht hebben om bede Otten van Hoclom heer van Asperen voern. desen brieff bezegelt mit onsen zeghele. Ghegheven int jaer ons heren 1300 ende dertiene des vriendaghes na dertiendaghe.

Copie.

Ic Robbrecht van Arkel heer vanden Berghe maken cond allen luden dat ic kennen ende lie dat men dat huijs tot Asperen die pointe ende alle die heerscepie van Asperen ende alle die heerscepien van Haghesteyne ende van Gaspulwaerde houdt van eenre hogher edelie ende machtigher vrouwen vrouwe Margriete bider genaden gods keijserinne van Romen altoes meersende gravinne van Heijnegouwen van Hollant van Zelant ende vrouwe van Vrieslant etc. ende wair dat zake dat ic vergaderde mit eenen wylachtighen huwelike ane joncfrouwe Aleijden vrouwe van Asperen ende Haghensteijne, so hebbe ic geloeft ende ghelove bij mijnre trouwen ende bij mijnre zekerhede voir mij ende voir mijne nacomelinge mijnre lieve vrouwen vrouwe Margrieten der keijserinne van Romen voorsz., dat is hoir ende horen nacomelingen ende altoes der heerscepien van Hollant getrouwe wesen sal in allen zaken ende mijnen liever vrouwen der keijserinnen voorsz. ende horen nacomelingen ende allen heeren ende vrouwen van Hollant die nae mijnre liever vrouwe der keijserinnen voorsz. comen sullen dienen ende ghehulpich wesen zal in allen manieren ende zaken daer sijs te doen sullen hebben metder heerscepien van Asperen ende van Haghesteyne voorsz. ghelijckerwijs als een gued getrouwe man raden off daden soude sinen gerechten hem of sijnre gerechter vrouwen. Ende dair nimmermeer jehgens te raden noch te daden omme gheenichande zaken die nu ane ligghen mochten, behoudelick dies dat ic mit mijns selfs live raden mach bij minen heeren broeder heeren Jan van Arckel bisscop tUtrecht zijn land te verweren. Ende bij anders nijemant wair dat zake dat hij ooc ghaens hadde maer altoes. So sullen die heerscepien van Asperen van Haghesteyne ende van Gaspuwaerde open bliven ende gehulpich wesen der graeflicheijt van Hollant. In oirconde desen brieve bezeghelt mit minen zeghele. Ghegheven tot Sente Geerdenberghe tsmaenendage nae Sente Bartholomees dach int jaer ons heeren dusent driehondert zesse ende veertich.

### **Folio 2.**

Copie.

Aelbrecht etc. doen condt allen luden dat voor ons quamen haer Dirck van Polanen heer van Asperen ende vrouwe Elburch vrouwe van Asperen sijn wijf ende droeghen ons op mit gesamender hant den vrien eijghendom van twien voergheburcht mit allen horen timmeringen die zij begrepen hebben ende gelegen sijn inde heerlicheijt van Asperen vanden graften die aint huus te Wadenburch gheret toten Hoekenlessen wech toe ende van erven wat dat gheheten es die .... toten poorte mure van Asperen toe op die een zijde, gheleghen all langhes die (prochikke) van Asperen mitten kerckhove. Welke voorgeborghe voor selven wij hem weder verliet hebben ende verleent te houden van ons ende van



onse nacomelingen tot zulken leene als sijt thuus tot Wadenburch van ons houden ende vrouwe Elburch vrouwe van Asperen voorsz. heeft gemaict mit onser hant heeren Dirck van Polanen heer van Asperen hoeren man, in rechten duwarien ende lijftocht dese twee voirgheborghe voorsz. gelijk dat sijt huus tote Wadenburch gedaen heeft. Ende wij gheloven dair in te houden ende te stercken nae sede ende custume van onsen lande. Ghegeven tot den des anderen daechs nae Valentijn anno seven ende tseventich.

Copie.

Phillips etc. doen condit allen luijden dat wij behoudelick ons ende eenen ijgelicken sijns rechts verleent ende verliet hebben, verlenen ende verliet mit desen brieffe joncfrou Konegont vrou van Asperen van Urst ende van Keppel mit Frederijck van Rechteren als horen geëchten man ende mombaer die poirte tot Asperen mitten heerlicheijt hoge ende lage mitten huijse aldaer geheten Waddenburch mit allen zijnen toebehoirne ende voirt alle alsulcke guede alle hair angecomen ende bestorven sijn van Jan van Vorst laetste heer tAsperen hairs broeders ende hij zijne voirouders van ons ende onser graeflicheijt van Hollant voorsz. te leen te houden plagen. Te houden van ons ende van onsen nacomelingen graven off gravinnen te Hollant, joncfrou Konegont voorsz. ende hueren nacomelingen tot sulcken recht ende teene ende welcke in alre manieren alse hueden voirvorden heur tAsperen ghehouden hebben, dats te weten tot eenen arleen gelijckenwijl die oude hantvesten ende up ende oick onse registeren die dan dair off sijn dat inhouden ende begripen. Ende hier van heeft ons hulde ende manscap gedaen Frederic van Rechteren haer geëchte man voorsz. Hier waren bij ende over onse getrouwe grave ende leenmannen Gaesbeeck, Wassenaer, IJselsteijn, Montfoirde, Cralingen, Zijl, Zwieten ende Godscalck Oem. In oirkonden etc. Gegeven opten eersten dach in junio int jair ons heeren 1400 ses ende dertich. Aldus geteijckent per ducem ducem coninc Hollande et pares etc.

**Folio 3.**

Copie..

Philips etc. doen condit allen luijden dat wij bij handen ons getrouwen ridder raet camerling ende goeverneur onsen lande van Hollant, Zeelant ende Vrieslant des heren van Santen de welcken wij dies in onsen absese gemachtich hebben behoudelic ons ende eenen ijgelicken sijns rechts verleent ende verliet hebben, verlienen ende verliet mit desen brieve onsen ge....den Zweder van Rechteren heer tot Vorst ende tot Kespel die poirt tot Asperen mitter heerlicheijt hoge ende lage mitten huijse aldaer gehieten Wtdenburch mit allen haren toebehoren. Ende hem angecomen ende bestorven sijn bijden overlijden van joncfrou Konegont van Asperen zijnen moeder was. Te houden van ons ende van onsen nacomelingen, Zweder voorsz. ende zijnen nacomelingen tot eenen erfleen. Ende voirt in sulcker manieren als zijn voirvaderen heeren tot Asperen dat altoes gehouden hebben. De welcke Zweder stont an onsen getrouwen den heere van Santen voirn. Ende in jegenwoirdicheijt van onse getrouwe raiden ende leenmannen hier nu bescreven oetmoedelic versocht ende begeerde overmits dattet hem noet dede niet ende oirbairlic was bij veel redenen die hij onsen voorsz. raide op dede doen ende bij enigen van zijnen naesten heren vrunden ende magen aldoe geaprobeert ende (gavenficieert?) worden mit brieven ende andersins beter gedaen dan gelaten die voorsz. poirt huijs ende heerlicheijt van Asperen den selven heer van Santen weder op te dragen ende quijt te scelden tot behoeff Aerts Pijck van Beest. Upt welcke versouck onse voorsz. raide ende manne gemaict als gewoenlick is, wijsden dattet mit rechte alsoe gescien soude. Ende dat alsoe gedaen ende volcomen ende die reden voorsz. wail verstaen wesende onse getrouwe die here van Santen voirn. dien wij in desen ende gelijcken saicken gemachticht hebben alst voorsz. staet, heeft den voirn. Aernt Pijck van Beest die voorsz. poort huijs ende heerlicheijt terstont weder ons op gedragen ende over gegeven als die voorsz. mannen wijsden dat recht was om die te houden van ons ende onsen nacomelingen graven ende gravinnen te Hollant Aernt Pijck voirn. ende zijnen nacomelingen tot enen erfleen. Ende vant in sulcker manieren als onse registeren ende ander hantvesten die dair off sijn dat verclaren, dats te weten dat Aernt Pijck voirn. ende zijne nacomelingen here tot Asperen ons ende onsen nacomelingen graven oft gravinnen te hollant dienen sullen dat huis ende die poirt tot Asperen voirnt. op doen tot allen tijden ende so wanneer wij off onse nacomelingen hem des versoucken om ons ende onsen nacomelingen dait wt ende dair in te behulpen ofs van node was als behoven sal. Present Selsteijn, Zijl, Zwieten, Bouchorst Oem, Mije, Paedse ende meer anderen In oirkonde, in datem negen ende twintich dagen in septembris int jair ons heeren dusent vierhondert acht ende dertich. Ende was aldus onderteijckent bij mijnen heer den hertoge grave van Hollant .....



**Folio 4.**

Copie.

Philips etc. doen condit allen luiden want Aernt Pijck van Beest gecomen is voir onsen getrouwen den heere van Santen gouverneure ende die andere van onse raide die wij georduneert hebben ten saicken onsen lande van Hollant, Zeelant ende Vrieslant ende heeft op gedragen ende ons gegeven mit zijnen vrien wille Ghijsbrecht Pijck zijnen vader dat gouvernement ende bedrieff van zijnen guede ende heerlicheden van Asperen mit horen toebehoeren die hij van ons ende van onsen graeflicheijt van Hollant te leen houdt duerende tvoirsz. Ghijsbrechts sijns vaders leven lang. Soe hebben wij tot oitmoedigen bede ende versoucke van Aernt voirn ende om sonderlinge saicken wille dair off onse voirsz. raide in onsen naem van sijre wegen wail geïnformeert ende onderwijst sijn den selven Aernt geconsenteert ende gegeven, consenteren ende gonnen mit desen brieve dat dat alsoe gesciede. Behoudelick dat Ghijsbrecht sijn vader voirn. die voirsz. gueden ende heerlicheden houden regieren ende bewonen sal in sulcker manieren als die hantvesten die die voirn. Aernt sijn soen van ons dair off heeft wtwijsen, inhouden ende begripen. Alle ding sonder arch ende list. In oirkonden etc. Datem ut supra in..... Ende was aldus onderteijckent bij mijnen heere den hertoge grave van Hollant .....

Copie.

Ik Ghijsbrecht Pijck van Beesde doen condit allen luiden want mijn genadige heer die hertoge van Bourgoingen ende van Brabant mij mit zijnen openen brieff Aernt Pijck van Beesde mijnen soen gegonnet ende geconsenteert heeft dat ic mijn leven lang duijrende dat gouvernement ende bedrieff hebben sal vanden poort huijse ende heerlicheijt van Asperen mit horen toebehoirne die hij van hem te leen houdende is. Behoudelick dat ic die samentlic houden, regieren ende bewaren sal in sulcken wegen ende manieren als die brief die daer off gemaect sijn dat wtwijsen. Soe hebbe ic geloeft ende gelove mit desen brieve bij mijnne trouwen eren ende sekerheijt dat ic die voirsz. slot stede ende heerlicheijt regieren ende bewaren sal ende doen bewaren so dat ick altoes tot vermaninge mijns genaden heeren voirsz. off sijre nacomelingen graven van Hollant dat voirsz. slot ende stede altijt openen sal om hem dair in ende dair wt te behulpen als hem dat noot ende oirbair wesen sal. Alle ding sonder argelist. Ende des te getuijge hebbe ic Ghijsbrecht voirn. mijnen zegell hier an hangende u gegeven. Aldus acht ende dertich twee dagen in octobri.

Dese vijff leste voirgaende copien sijn getogen wt tregister van Hollant ende dair tegens gecolleerdit bij mij Buschuijsen.

**Folio 5.**

De laatste brief is in het Latijn.

